

M243: Der Wilde Mann: Dichtungen

- 0,1 daz di wilde man getihtet hât .
0,2 der heilige geist gap im den rât .
0,3 dâ alle tugent ane geschiet .
0,4 aleine en kan er der buoche niht .
0,5 iz meisteret di gotes kraft .
0,6 di gibet di wîsheit unde maht .
0,7 sôwer einer tugende willet . beginnen .
0,8 hê sal es . an den heiligen geist gesinnen .
0,9 sô machet hê daz ende guot .
0,10 alsô wêrlîche sô hê Mosese sterkete sînen muot .
0,11 inde wîsende allez waz her sprach .
0,12 dô er in in dem viure sach .
0,13 hê leiste ouch Gideonis bete .
0,14 di lûtzet guotes durch in tete .
0,15 iedoch sô gap er ime di maht .
0,16 daz er wider Philisteum vaht .
0,17 her lêrte den esel daz er sprach .
0,18 und ouch daz er den engel sach .
0,19 maniger tugende hât er mê .
0,20 dô er ûfe Dâvîden verzêh .
0,21 unde vergap ime sîne missetât .
0,22 unde wîste Salomone den rât .
0,23 daz hê schreip di wîsheit allen sînen lîp .
0,24 iedoch hê hatte mêr danne tûsent wîp .
0,25 und Austri machete wîse unde rîche .
0,26 ir ne mohte niet sîn gelîche .
0,27 unde Susannen erlôste .
0,28 unde Danielelem getrôste
0,29 mit Habakukes spîse .
0,30 di müeze her uns ouch gewîsen .
0,31 di in diseme ellende sint .
0,32 noch erlôste hê driu kint
0,33 di in den oven sint gesatzt .
0,34 her hôrte ouch daz in Ezechias bat .
0,35 durch den hê di sunnen tete stên .
0,36 unde wider an den ôstene ûf gên
0,37 dô her ime vûnvzien jâr hatte gegeben .
0,38 dâ mite lengete ime sîn leben .

0,39 hê gap allen prophêten di wîsheit .
0,40 unde Sibillen allez daz dâ geschriben stêt .
0,41 doch en hatte hê die minner niet .
0,42 sint allez dit wunder ist geschiet .
0,43 mit sîner manicvaltigheit .
0,44 di himel unde erde umbeveit .
0,45 des meres vluz bekennet hê wole .
0,46 ouch weiz hê der sterren zale .
0,47 wie wole ich im getrûwen .
0,48 daz hê mit mir sule bûwen
0,49 des wile ich an in gesinnen .
0,50 swanne ich einer rede beginnen .
0,51 daz si gote ze lobe wolle kumen .
0,52 und aller kristenheit vrume .
0,53 wie wole ich arme des bedarf .
0,54 wande ich nâch îtelkeite ie . warp .
0,55 wolte mich got sô vile lêren .
0,56 daz ich ein mennischen mohte bekêren .
0,57 sô konde ich harte wole di buoch .
0,58 sôweme dô genûeget di hât genuoge .
0,59 unde swer sich mit rehter mâze treget .
0,60 dem en wirt niht widersaget .
0,61 wande got allez mit der mâze vollebrâhte .
0,62 daz uns di prophêten vore sahten
0,63 dô alle die prophêtî vûre quam .
0,64 diu man von aneginne vernam .
0,65 unde die wîssagen wâren tôt .
0,66 ire sêle hatten grôze nôt .
0,67 ire ê . en mohte in niet gevrumen .
0,68 êr der gotes sun wolte kumen .
0,69 dô der heilige geist . heilic was genant .
0,70 den ouch Daniel hatte . bekant .
0,71 der Nabuchodonosor erschein .
0,72 daz was die drîeckehte stein .
0,73 den er in sîneme slâfe gesach .
0,74 unde daz grôze bilede zerbrach .
0,75 dem daz houbet an den himel gienc .
0,76 der stein al ertrîche bevienc
0,77 daz was di wîsheit und di gedanc .
0,78 di von himele in ertrîche spranc .
0,79 unde von der megede wart geboren .
0,80 ze erloesene di dâ wâren verloren .
0,81 der hellen klage hê verhôrte .
0,82 al unreht hê zuostôrte .
0,83 die wîl hê in der werlte gienc .
0,84 vile maniger genâde von im entvienc .
0,85 di maselsûhtige machete hê gesunt .
0,86 unde heilete di dâ wâren wunt .

0,87 den tôten tet hê ûf stên .
0,88 den blinden tet er siente gên .
0,89 ein wîp hiez Veronica .
0,90 di volgete im durch liebe nâch .
0,91 swanne siu sîn antlitze an gesach .
0,92 si vröuwete sich allen den tac .
0,93 wande si zuo im grôze minne truoc .
0,94 Lucase brâhte sie ein tuoeh .
0,95 si vlêhete beide unde bat .
0,96 daz ir dâr ane würde gesat .
0,97 daz antlitze des heilæres .
0,98 “wande dû der meister einer bis .
0,99 unde dû in dicke hâst gesien .
0,100 ich hoffen daz mir sule geschien .
0,101 genâde ob dû dû mir schrîben wilt .
0,102 ich wile dir iemer wesen holt .
0,103 unde lône es dir mit minnen .”
0,104 “nû wile ich es beginnen .”
0,105 sprach di guote Lucas .
0,106 “ich schrîben dir alse hê hiute was .
0,107 ich wæne ich ie mâlnes begunde
0,108 êr denne anderes gerâmen konde .”
0,109 dô schreip hê daz bilede alsô guot .
0,110 daz iz im ervröuwete allen sînen muot .
0,111 dô wânte hê . daz iz wære
0,112 gelîch dem heilære .
0,113 di alle di werlt het geschaffen .
0,114 beide leien unde pfaffen .
0,115 juden unde Sarracenî .
0,116 si ne mügen niet gelîch sîn .
0,117 iz ist allez unterscheiden .
0,118 alse di boume vore der heiden
0,119 ungelîch stên unde griez
0,120 unde der tîch und des meres griez .
0,121 sunne unde mâne en wart nie gelîch .
0,122 mirabilis deus daz quît got wunderlich .
0,123 zale . di sterren gênit unde habent
0,124 der sun weiz vile wole .
0,125 wan sîn vater gap im di wîsheit .
0,126 dô er von himele her in ertrîche schreit .
0,127 herre Salomon quît hê sprünge belîbe .
0,128 sôwer hin ab wolte schrîben .
0,129 her en dorfte niemer geruowen .
0,130 dâr umbe en mohte es Lucas niet getuon .
0,131 doch versuochten si sich .
0,132 ob iz im wære gelîch .
0,133 dô giengen si in einer kurzer stunten .
0,134 dâ si den heilant vunden .

0,135 dâ hê sînen jungeren vore sprach .
0,136 unde alse er in under den ougen sach .
0,137 dô was sîn antlitze verwant .
0,138 alse hê in nie hette erkant .
0,139 des wunderten si sich beide .
0,140 der vrouwen wart dô sô leide .
0,141 alse ir iezuo solte verschwinden .
0,142 si weiz ez iren sünden .
0,143 unde klagete gote ire missetât .
0,144 “des sal werden guot rât .”
0,145 sprach der schrîbente man .
0,146 eines anderen biledes er begienc .
0,147 di vrouwe weinete unde schrei .
0,148 wan iz arger was danne êr .
0,149 unde als hê ez diu dritte stunt getete .
0,150 dô verhôrte got der vrouwen bete .
0,151 unde alse si her an sach .
0,152 nû hoeret wie unser heilant sprach .
0,153 “Lucas dû geist mir nâhe .
0,154 und daz guote wîp Veronica .
0,155 dîne liste en mûgen dir niet gevrumen .
0,156 iz en sule von mîner helfe kumen .
0,157 wan mîn antlûtze en wart ne bekant .
0,158 wan aldâ danne ich bin gesant .
0,159 von der obersten wîsheit
0,160 ouch ist ez den engelen ungereit .
0,161 al biz dere mennischen kint den tôt .
0,162 erlîdet durch al der werlte nôt .
0,163 unde des dritten tages ûf ersteit .
0,164 unde vierzige tage in ertrîche geit .
0,165 sô werdent di geloubigen erlôst .
0,166 di himele sint mit ime getrôst .
0,167 sô wirdet des mennischen kint gesatzt .
0,168 zuo der zesewen in sînes vateres stat .
0,169 dise rede is wâr unde sal geschien .
0,170 sint en mûgen si mich niemer mennische under in gesien .”
0,171 unde als der gotes sun heilant .
0,172 der vrouwen herze hatte bekant .
0,173 unde wâr zuo si guoten willen truoc .
0,174 her sprach “gânt heim unde nim dîn tuoch .
0,175 unde ein lûtzel inbîz mache mir .
0,176 noch hiute kumen ich zuo dir”
0,177 grôze vrôuwede si entvienc .
0,178 îlente dâ si heim gienc .
0,179 si rihte ire stuole . unde bettegewant .
0,180 dô quam der gotes sun zehant .
0,181 her hiez wazzer unde begunde sich dwahen .
0,182 unde alse hê dit hatte getân

0,183 hê drückete sich an daz tuoeh .
0,184 daz siu mit grôzen vrôuweden dare truoc .
0,185 iedoch en was ez niet lanc .
0,186 under ougen her ez dwanc .
0,187 die dwehele daz antlitze entvienc .
0,188 geschaffen . alse der gotes sun gienc .
0,189 unde alse der heilant si ane sach .
0,190 zuo deme guoten wîbe daz her sprach
0,191 “dit mac mir wole wesen gelîch .
0,192 hin ab salt dû werden rîche .
0,193 iz sal allen dînen vriunden vrumen .
0,194 ouch sal dir zeichen abe kumen .
0,195 alse man mich hier niemere en mac gesien .
0,196 danne allerêrste sal iz geschien .”
0,197 alse Jêsus danne begunde gân .
0,198 sô streich hê an dem Jordân .
0,199 vile liute ime nâch gienc .
0,200 aldâ hê von sancte Johanne di toufe entvienc .
0,201 di in mit vorhten ane sach .
0,202 aldâ hê von ime sprach .
0,203 under meinen allen .
0,204 “dit ist mîn vile liebe sun dâ ich mir wole ane gevalle .”
0,205 dâ wart di drîvalticheit . benant .
0,206 ein tûbe brâhte den krisemen . alzehant .
0,207 daz was der heilige geist .
0,208 di ervulte di namen allermeist .
0,209 daz es alle di vrôuwede gewunnen .
0,210 di der toufe hatten begunnen .
0,211 in der wüstenungen .
0,212 lobeten si got unde sunen .
0,213 unde îleten vile balde .
0,214 mit sancte Johanne wider zuo den walde .
0,215 unde alse her von dem Jordân .
0,216 zuo quertîne begunde gân .
0,217 dâ barc hê sich aleine .
0,218 ûf einem hôhen steine .
0,219 aldâ hê vierzige tage saz .
0,220 noch en dranc . noch en az .
0,221 dâ gienc list wider liste .
0,222 wande der tiuvel niene wiste .
0,223 weder hê got ob mennische wære .
0,224 daz muote in alsô sêre .
0,225 hê saz ie . vast an sîneme gebete .
0,226 dô versuochte hê in alse hê vrouwe Even tete .
0,227 der hê den schoenen apfel bôt .
0,228 hê sprach “nim disen stein unde mache brôt .
0,229 ob dû gotes sun bist .”
0,230 dô wânte er in mit valscher list .

0,231 unde mit vrâzheite bekoren .
0,232 dâ mit der mennische wart verloren .
0,233 des antwurte im di wîsheit .
0,234 hê sprach “dû weist wole waz geschriben steit .
0,235 man en sal niet aleine des brôtes leben .
0,236 mêre des gotes wortes des uns nôt is .”
0,237 hier mit was der tiuvel geblant .
0,238 unde hatte in wirs danne êr bekant .
0,239 nû hoeret eine grôze ôtmüetigkeit .
0,240 daz gotes sun den tiuvel reit .
0,241 zuo Jerusalêm hê in vuorte .
0,242 sô hê in mit übele niene geruorte .
0,243 unde also hê in ûfe den tĒmpel hatte gesatzt .
0,244 sô versuochte hê in alsô vrouwe Evâ gebat .
0,245 herren Adâmen daz hê daz obez . az .
0,246 durch ir liebe her sich vergaz .
0,247 unde begunde sînen schepfære bekoren .
0,248 des wurden si beide verloren .
0,249 unde ûz dem paradîse verschalten .
0,250 der tiuvel sprach “dû en darft dich niet halten .
0,251 unde val hier nider mit dîner list .
0,252 ob dû gotes sun bist .
0,253 ich weiz wole daz geschriben steit .
0,254 hier kument di engele sô gereite .
0,255 di dich sô samfte vüerent .
0,256 daz dîne vuoze niet en rüerent .
0,257 decheiner hande ungemach .”
0,258 nû hoere wie der gotes sun sprach .
0,259 “iz is geschriben dû bis verloren
0,260 man en sal sînen schepfær niet bekoren .
0,261 man sal in iemer loben unde êren .”
0,262 noch dô vuorte er unser herren .
0,263 ûfe den hôhesten berc den hê iergen vant
0,264 di gireheit zöugete im zehant .
0,265 dâ mite hê Adâmen stach .
0,266 dô hê vile lügenlîche sprach .
0,267 “wolte dû wesen also got .
0,268 sô salt dû zuobrechen sîn gebot .
0,269 sô müget ir im gelîchen .”
0,270 dâ mit wântten si sich di armen gerîchen .
0,271 unde verluren di êwiclîche wünne .
0,272 si und al ire künne .
0,273 alsus gruozte her dem mennischen . kinde .
0,274 hê sprach “sich dise lant di sô schône sint .
0,275 dit geben ich dir wolte dû an mich jehen .
0,276 und allez daz dû maht über sehen .
0,277 sô en mac dir niet gelîchen .
0,278 bette mich an ich mache dich rîche .”

0,279 der nie sünden begienc .
0,280 dem tiuvele hê antwürten begienc .
0,281 “waz solte mir dîne rîchheit .
0,282 dû weist wole waz dâ geschriben steit .
0,283 daz allerêrste daz is dîn val .
0,284 und daz man niemannen ane beten en sal .
0,285 wene got unseren herren .
0,286 aller dinge schepfære .
0,287 var hin” sprach er “satanâs .
0,288 aldâr dû gewirket hâs .
0,289 wider in dîn arbeit”
0,290 dô quâmen di engele dô bereite
0,291 von himele eine grôze schare .
0,292 si dienten ireme herren unde nâmen sîn ware .
0,293 wande der tiuvel sô danne was gewant .
0,294 daz hê sîn niet hatte erkant .
0,295 vile gerne her dâr umbe dâhte .
0,296 wie hê in zuo deme tôde bræhte .
0,297 an Judase versuochte hê in zehant .
0,298 dâ hê di lôsheit ane vant .
0,299 unde geriet daz hê sînes meisteres verlougenete .
0,300 unde in umbe drîzic pfenninge verkoufete .
0,301 dâ mit wurden di juden gevalt
0,302 unde wurden sint ouch alsô versalt .
0,303 hê riet ouch daz man gotes sun vienc .
0,304 aldâ di passie ane gienc .
0,305 mit übele si in ruorten .
0,306 wande si in mit gelfe vuorten .
0,307 di geloubigen volgeten ime unvrô .
0,308 al zuo monte Sion .
0,309 umbe eine sûl si in bunden .
0,310 mit geiselen si in wunten .
0,311 wie sêre si in sluogen .
0,312 eine dürnîne krônen si im zuo truogen .
0,313 unde als siu im ûf daz houbet wart gesatzet .
0,314 daz bezeichnenet daz .
0,315 wie ein lamp einen mennischen erlôste .
0,316 dô herre Abraham ûf eineme rôste .
0,317 sîn kint hatte gebunden . unde wolte iz slân .
0,318 der engel sprach “nû lâz stân .
0,319 got entkennet dîne milticheit .
0,320 sich hier wâ ein wider . steit .
0,321 geworren under disen dornen
0,322 mit sînen krumben hornen .”
0,323 des vrôuwete sich herre Abraham .
0,324 sîn kint daz hê iezuo solte slân .
0,325 deme half hê nider unde begreif den wider .
0,326 unde opferte den got lobete hê sider .

0,327 daz lamp daz warf her in den rost .
0,328 dâ mit wart sîn kint erlöst .
0,329 der bendel wart ouch dâ verbrant .
0,330 den gotes sun nâmen si bî der hant .
0,331 lügenworte si ûf in tâten .
0,332 vore Pilatum si in brâhten .
0,333 unde begunden alle über in klagen .
0,334 dô iz allerêrste begunde tagen .
0,335 dô hê vore ime wart verzalt .
0,336 dô wart der tiuvel allerêrste gevalt .
0,337 hê berouw sich daz hê es ie geruochte
0,338 wande gotes sun daz kriuze truoc .
0,339 swîgente alse daz lamp teit .
0,340 daz niet en rüefet sô man iz sleit .
0,341 sîn kriuze stiez her in den stein
0,342 daz hê wart von vorhten al ze kein .
0,343 dâr an nagelten si den heilant .
0,344 der uns zuo trôste wart gesant .
0,345 an deme kriuze . hê den sigen nam .
0,346 den geloubigen hê zuo trôste quam .
0,347 daz hatte ouch der prophête vore gesât .
0,348 einen spongen bant man an einen schaft .
0,349 dâ inne was ezzich unde gallen .
0,350 garst was iz mitalle .
0,351 dô der gotes sun daz abe gedranc .
0,352 daz bezeichente herres Adâmes gedanc .
0,353 dô ime daz wîp den apfel gap .
0,354 in sînen hals gienc im daz . saf .
0,355 den boum streichete hê mit der hant .
0,356 wande hê die rinden süeze vant .
0,357 dô si den vîgenboum hatte zuobrochen .
0,358 daz wart an dem gotes sune gerochen .
0,359 dô man im di nagele durch di hende sluoc .
0,360 dâ mite ervalte hê den vluoch
0,361 der in dem paradîse geschach .
0,362 dô der mennische gotes gebot zuobrach .
0,363 dê êrste di dâ wart erlöst .
0,364 di gibet uns einen guoten trôst .
0,365 Dismas was hê genant .
0,366 dô got sînen riuwen hatte bekant .
0,367 unde hê im klagete sîne nôt .
0,368 hê sprach “herre ich bin von rechten schulden tôt .
0,369 dû entgiltes dîner güete .
0,370 durch dîn ôtmüete .
0,371 nû muost dû mîn armen .
0,372 in dînes vateres rîche erbarmen .”
0,373 unde alse hê sîne bigihte hatte getân .
0,374 dô begunden si im mit kolben slân .

0,375 di bein brâchen si im zehant .
0,376 dô wart der schâchær vore gesant .
0,377 zuo der helle brâhte hê den trôst .
0,378 hê sprach “ir werdet iezuo erlôst .
0,379 ich liez in an dem kriuze stân .
0,380 dê mir genâde het getân .”
0,381 noch danne sô wære der vînde schal .
0,382 al biz hê sancte Johannî sîne muoter bevalh .
0,383 vile sêre weinte si ire kint .
0,384 daz sper brâhte ein jude blint .
0,385 dâ mit her unser herren stach .
0,386 hê wart geloubic unde sach .
0,387 daz bluot hê an di ougen streich .
0,388 dô verschiet gotes sun unde wart bleich .
0,389 sîn gottheit zuo der helle quam .
0,390 di sîne hê dâ ûz nam .
0,391 wande hê den êrsten lôn entvienc .
0,392 dô hê in daz paradîs gienc .
0,393 dô stuont der engel in sîner gewere .
0,394 hê sprach “mich dunket daz dû mich mit here . suoches .”
0,395 unde alse hê im daz kriuze gebôt .
0,396 dô giengen si in sunder nôt
0,397 wande hê daz reht urkünde gesach .
0,398 sint ruoweten si unde hatten gemach .
0,399 herre Josepch unde herre Nicodemus .
0,400 si giengen zuo her herren Pilates hûse .
0,401 mit vorhten . si daz tâten .
0,402 daz si den urloup bâten .
0,403 “umbe Jêsus corpus daz dâ steit .
0,404 wande iz iezuo an den âbent gêt .
0,405 hê steit uns lasterlîche dâ .
0,406 wande herre unse hôchzîte is nâhe .”
0,407 unde alse hê in den urloup gap .
0,408 zehant sô macheten si daz grap .
0,409 wie samfte si in abe huoben .
0,410 wie schiere si in begruoben .
0,411 einen grôzen stein si ûf in lahten .
0,412 den si vile kûme dare brâhten .
0,413 dô giengen di juden in einen rât .
0,414 si sprâchen “noch wizzet ir wole daz Jêsus hât .
0,415 dicke gesprochen unde sich vermaz .
0,416 under sînen jungeren dâ hê saz .
0,417 hê solte sterben unde erstân .
0,418 unde vierzic tage in der werlte gân .
0,419 sô wolte er danne . zuo himele varen .
0,420 iz ist guot daz wir uns bewaren .
0,421 daz uns êwe . nie zuogê .
0,422 sîne jungeren kunnen gedenken mêr .

0,423 ouch hân ich vile dâr umbe gedâht .
0,424 si mûgen in stelen in der naht .
0,425 unde sagent daz hê erstanten sî .
0,426 unse huote haben wir dâ bî .”
0,427 dô gewunnen si in ire ahten .
0,428 rîræt di si dar lahten .
0,429 beide tump . unde wîs .
0,430 si wâren gewâfenet als ein îsen .
0,431 dâ huoten si di zwâ nahte .
0,432 dô quam ein engel mit grôzer maht .
0,433 in vreislicheme getæne .
0,434 unde lieplich an zuo sienne .
0,435 daz houbet brante ime als ein gluot .
0,436 di jene di daz grap hatten behuot .
0,437 si lâgen in grôzen sorgen .
0,438 unde hetten sich gerne geborgen .
0,439 dô der engel den grôzen stein zuobrach .
0,440 hê warf in abe mit einer hant .
0,441 di erde erbibete durch nôr .
0,442 si lâgen alse si wâren tôr .
0,443 dô erstuont der gotes sun bî der naht .
0,444 alse hê dô bevore hatte gedâht .
0,445 daz sâhen di dit sagen .
0,446 des mohten si sich sint gebâgen .
0,447 dô giengen si predigen in der stat .
0,448 unde wie sich der engel hatte gesatzt .
0,449 dô quâmen zwâ Marien .
0,450 unde begunden sêre schrîen .
0,451 di eine hiez Magdalê .
0,452 ir volgete vrouwe Salomê .
0,453 eine dorfte dâr niengen kumen bî .
0,454 iedoch sô schrîbet man ir drî .
0,455 si brâhten salben unde krût .
0,456 dô sprach der engel überlût
0,457 wider jene di in gegruozten .
0,458 waz si dâ suochten .
0,459 si sprâchen “Jêsum von Nazarân .
0,460 wir hoffen daz hê sule erstein .
0,461 di wart gekriuziget unde begraben .
0,462 waz het den grôzen stein ûf gehaben .”
0,463 dô sprach der engel “iz ist geschien .
0,464 nû geit her nâher daz ir mûget sien .
0,465 hier vindet ir urkûnde genuoc .
0,466 dit is di grap . unde ouch daz tuoeh .
0,467 di vore sîn ougen was gelaht .
0,468 unde dô hê under disen stein was gedaht .”
0,469 vroeliche schieden si von ein .
0,470 sancte Marien Magdalênen . hê erschein .

0,471 der gotes sun . daz hê wider si sprach .
0,472 daz si in ouch vleischliche gesach .
0,473 alse si dâ bevore hatte getân .
0,474 hê hiez si ûz der stat gên .
0,475 dâ hin zuo monte Sion .
0,476 “mîne jungeren sole dû machen vrô .
0,477 unde sage in daz ich erstanden sî .
0,478 unde troeste ouch Petrum dâ bî
0,479 dâ her liget mit sorgen .
0,480 in Galilea geborgen .”
0,481 der jungeren ouch dâ nie en was .
0,482 Lucas unde Cleophas .
0,483 si schieden sich wider morgene
0,484 unde strichen ûz mit sorgen .
0,485 si hatten angest unde wân .
0,486 ob der gotes sun solte erstân .
0,487 mit handen si sich beviengen .
0,488 zuo Emaus si giengen .
0,489 ein iegelich den anderen bat .
0,490 al biz si quæmen an di stat
0,491 daz hê im von gote sehte .
0,492 unde îtelicheit niet en dæhten .
0,493 der gotes sun hê gienc in nâch .
0,494 hê sprach “herren wâr ist iu . sô gâch .
0,495 muoste ich iuwer geverte sîn .”
0,496 dô gienc hê als ein pilgerîm .
0,497 hê vrâgete si umbe mære .
0,498 mit hovelîchem gebære .
0,499 daz si des vrôuwede entviengen .
0,500 alsô riuwic sô si giengen .
0,501 si sprâchen “ir siet wole daz wir riuwic gên .
0,502 joch kumet ir ouch von Jerusalêm .
0,503 di selbe mære hôrtet ir sagen .
0,504 di zuo Jerusalêm wart geslagen .
0,505 an daz kriuze sunder schult .
0,506 di juden en wâren im niht holt .
0,507 nû liget hê drî tage begraben .
0,508 alse hiute solte hê sich hân erhaben .
0,509 iz en wart nie niet sô guotes .
0,510 wan ob hê erstanten is .
0,511 sô is alle di prophêtie vollekumen .
0,512 di wir von alter hân vernomen .”
0,513 der gotes sun predigete in ouch genuoc .
0,514 ûze Moseses buoche .
0,515 allez daz zuo der kristenheite traf .
0,516 wie guoten trôst hê in gap .
0,517 si en mohten sîn nicht verdriezen .
0,518 wan si in nicht entliezen .

0,519 unde bâten in mit in zuo herberge gân .
0,520 unde alsolich inbîz mit in entvâhen .
0,521 als in got verlûwe .
0,522 daz teilten si im mit triuwen .
0,523 beide brôt unde wîn .
0,524 dô volgete in der pilgerîm .
0,525 mit minnen si in ladeten .
0,526 zwüschē si zwēne si in satzten
0,527 daz brôt lahten si im ûf den schôz .
0,528 dô wart iz drî werbe alsô grôz .
0,529 alse hê ez gesegenete und zuobrach .
0,530 ir neweder niet mêr in sît gesach .
0,531 unde alse hê was gewon
0,532 Lucas greif im mit der hant nâch .
0,533 “wie nû” sprach hê “Cleophas .
0,534 wâr quam der man di hier was .
0,535 ouwî daz wir sîn niht en kanten .
0,536 iz was gotes sun der ist entstanten .
0,537 hê gienc mit uns allen disen tac .
0,538 di süezen wort hê uns vore sprach .
0,539 di sulen wir merken beide .
0,540 wande mir nie geschach sô leide .
0,541 doch ist mir liebe dâ bî .
0,542 ich offēnen ob schrîben daz her entstanten sî .”
0,543 danne vuor hê zuo den sînen .
0,544 sînen jungeren wolte hê erschînen .
0,545 dâ si inne beslozen wâren .
0,546 hê en bat sich nieman in lâzen .
0,547 mit einem vride quam hê under si .
0,548 hê sprach “trôst iu . ich wise iu . bî
0,549 aleine en sehet ir mîn niet .
0,550 ich ezze gerne hât ir iet .”
0,551 dô satzten si in über einen tisch .
0,552 dô az hê honic unde visch .
0,553 daz nâmen si vaste in iren sîn .
0,554 herre Thomas en was dâ niet bî in .
0,555 unde sô schiere sô Thomas wider quam .
0,556 unde hê dô mære vernam .
0,557 daz si gotes sun hatte gegesîn .
0,558 hê sprach “iz en mac niemer geschien .
0,559 ich sach in sô stechen unde slân .
0,560 ich en kume es niemer an den wân .
0,561 unde en wile iuch niemer mite gejien .
0,562 êr . ich di selbe wunden sien .
0,563 dâ in hin di blinde jude stach .”
0,564 dâr nâch über unmanigen tac .
0,565 begunde der gotes sun under si gân .
0,566 alse hê hatte getân .

0,567 unde alse hê “pax vobis” gesprach .
0,568 Thomas in dâ an sach .
0,569 di sîn dâ bevore lougenete .
0,570 sîne wunden hê ime zounete .
0,571 unde liez sich tasten mit der hant .
0,572 di wunden bluotic hê bevant .
0,573 alse hê dâ vore hatte gesien .
0,574 hê entvienc genâde ûfe sînen knieen .
0,575 hê sprach “mîn geloube is nû mêrre .
0,576 dû bist mîn gotes herre .
0,577 dîn genædicheit hât mich wole bedâht .
0,578 daz dû mich geloubic hâs brâht .”
0,579 daz got sînen jungeren hât behuot .
0,580 daz ist uns süntæren guot .
0,581 hê sprach “Thomas dû salt sælic sîn .
0,582 michel sæliger di holden mîn .
0,583 di geloubent unde mich niene gesâhen .
0,584 hin ab sulen si sich bâgen
0,585 unde sterken di rehte wârheit .
0,586 wan mînes vateres rîche ist in bereit .”
0,587 des gesinnet ouch der wilde man .
0,588 wande hê der rede alsô begân .
0,589 iz givet der kristenheite maht .
0,590 unde hæte di juden nider gelaht .
0,591 iz ist reht daz man vûre ine bete .
0,592 swaz hê ie übeles getete .
0,593 daz iz got vergezzen wille .
0,594 unde sîn harmschare gestille .
0,595 got en muoz iz niet verdriezen .
0,596 sîner ûfverte wir geniezen .
0,597 dâr zuo hê sîne vile liebe muoter nam .
0,598 dô hê mit sînen jungeren quam .
0,599 zuo einem berge di ôle truoc .
0,600 der geloubigen was dâ genuoc .
0,601 unde si wolten warten unde sien .
0,602 wanne daz wunder solte geschien .
0,603 daz “pater noster” hê in schreip .
0,604 daz was der trôst di in dô beleip .
0,605 hê sprach “here an sulet ir iuch gehalten .
0,606 ir sulet ouch niet erbalden .
0,607 zehen tage solet ir iuch bereiten .
0,608 sô senden ich iuch einen leiten .
0,609 der sal dicke mit iu . wanen .
0,610 unde sol iuch alles des ermanen .
0,611 daz ich ie wider iuch gesprach .”
0,612 daz was der jungeste tac .
0,613 daz got zuo himele wolte varen .
0,614 in der luft begunden sich di engele . scharen .

0,615 dô der gotes sun ûf zuo himele schreit .
0,616 mit im vuorte hê di ôtmüetigheit .
0,617 dâ hê di stolzheit mit verwan .
0,618 dit gesâhen galilêische manne .
0,619 “viri Galileae
0,620 quit admiramini .
0,621 wes wundert iuch” sprach di stimme .
0,622 “daz diuse gotes gimme .
0,623 zuo iuwer gesihte zuo himele vert .
0,624 di alle geloubigen generet .
0,625 alsus sô sal hê wider kumen
0,626 al den sæligen zuo vrumen .”
0,627 di engele in entviengen .
0,628 sîne jungeren danne giengen
0,629 mit michelen sorgen .
0,630 dâ si abe sâzen geborgen .
0,631 unse liebe vrouwe gienc under si .
0,632 si trôste si unde saz in bî .
0,633 unde sagete in tugenden genuoc .
0,634 wie ir was dô si unseren herren truoc .
0,635 unde von ire lebene dô si in entvienc .
0,636 unde von dem wege dô si zuo ire niftelen gienc .
0,637 daz was kûme ein halbe mîle .
0,638 hier mit kürzete si in di wîle
0,639 al biz iz quam an den zehenden tac .
0,640 als in got selbe ouch vore sprach .
0,641 ein michel viur quam under si .
0,642 der heilicgeist was ouch dâ bî .
0,643 di in daz herze entbrante .
0,644 daz iewelich erkante .
0,645 daz di vorhte an im erstarp .
0,646 sancte Pêter ûf di porten . warf .
0,647 ires gelouben si begunden
0,648 des si êr des niene kunden .
0,649 si en vorhten . swert joch den tôt .
0,650 alsus erlôste got von der nôt .
0,651 sîne liebe knehte .
0,652 dô predigeten si daz reht .
0,653 der sâme di dô wart gesât .
0,654 di wirdet zuo deme jungesten tage gemeit .
0,655 di ungeloubigen sol man verteilen .
0,656 di geloubigen zuo heilen .
0,657 mit den geloubigen müezen wir wesen .
0,658 daz wir zuo den êwen genesen .
0,659 in gotes namen “âmen .”
0,660 sprechet alle samen .
0,1 ein wunder zuo Rôme geschach .
0,2 vore zwein unde vierzic jâren unde ein tage .

0,3 von eineme künige vile gehêr .
0,4 Vespasianus hiez her .
0,5 Titus was sîn sun genant .
0,6 di verwaltigete alle di lant .
0,7 daz si im wâren undertân .
0,8 waz half in daz si mohten hân .
0,9 schatzes vile unde genuoc .
0,10 der alte küninc eine siuchede truoc .
0,11 an sîneme anesiune
0,12 vreislich an zuo siene .
0,13 di wespen ime in deme houbete zugen .
0,14 daz si also dicke ûz vlugen .
0,15 also diu bîe von den imben teit .
0,16 daz was ein michel jâmerkeit .
0,17 im en half schatz noch lant .
0,18 wante hê necheinen arzât vant .
0,19 di sich des underwûnte .
0,20 daz hê in geheilen kunde .
0,21 sô michel was sîn ungemach .
0,22 daz man ime durch sîn houbet sach .
0,23 iz was allez abe verezzzen .
0,24 got en hatte sîn vergezzzen .
0,25 dô quam ein israhêlisch man .
0,26 Titus den zuo ime gewan .
0,27 unde liez in sînen vater sien .
0,28 ime solte guot von im geschien .
0,29 unde also hê den vreisen gesach .
0,30 zuo deme künige hê guotliche sprach .
0,31 “zuo Jerusalem geit ein man .
0,32 der dit wole gebüezen kan .
0,33 den heizet man Jêsum* gotes kint .
0,34 di heilet alle di dâ sint .
0,35 hê en is niet sô sêre wunt .
0,36 von sînen Worten werde hê gesunt .
0,37 mohtes dû dich bereiten .
0,38 über mere wolte ich dich leiten .
0,39 gezöuges dû im dîn ôtmuot .
0,40 vile schiere wære dir gebuozt .”
0,41 der küninc siufzen began .
0,42 hê sprach “nû sîihes dû wole daz ich en kan .
0,43 hier vore hâte ich grôze kraft .
0,44 nû en habe ich leider di maht .
0,45 daz ich iz vollebræhte .
0,46 wie gerne ich iz gedæhte .”
0,47 hê sprach “liebe sun waz ist dîn rât .
0,48 umbe daz uns dirre man gesaget hât .
0,49 ob dû dich hüebes über mere .
0,50 unde næmes mit dir ein michel here .

0,51 dâr zuo silber unde golt .
0,52 sô vile sô dû es haben wolt .
0,53 unde bringe mir den guoten man .
0,54 ob hê mir gehelfen kan
0,55 ich geben ime maht dû sagen .
0,56 waz ein kiel goldes mac getragen .
0,57 unde dâr zuo mîn hulde
0,58 daz ich iz umbe in wile verschulden .”
0,59 der sun sich schiere beriet .
0,60 hê strebete wider den vater niet .
0,61 hê hiez ime kiele reiten .
0,62 hê en wolte niet langer beiten .
0,63 über mere huop hê sich zehant . mit grôzer maht .
0,64 unde ouch jener di im hatte gesaht .
0,65 wâ hê den heilant vûnde .
0,66 wan hê hatte sîn keine kûnde .
0,67 vile schiere quâmen si an daz lant .
0,68 daz is noch Syrie genant .
0,69 dô îlten si zuo Jerusalêm
0,70 beide rîtente unde gên .
0,71 dô vrâgete hê umbe sînes vateres nôt .
0,72 dô was der gotes sun lange tôt .
0,73 unde ûf zuo himele gevaren .
0,74 sint suochte hê in mit grôzer schare .
0,75 dô vrâgete hê umbe di gelegenheit .
0,76 wie der gotes sun den esel reit .
0,77 unde umbe alle di zeichen . di hê hatte getân .
0,78 di geloubigen begunden zuo ime gân
0,79 unde sageten wie im geschach
0,80 unde wie hê wider sînen jungeren sprach .
0,81 dit tet hê allez schrîben .
0,82 dô redete man von dem wîbe .
0,83 daz wart vile schiere mære .
0,84 wie gotes antlûtze dâ wære .
0,85 des vrôuweten sich des küniges manne .
0,86 di vrouwen man vûre in gewan .
0,87 di iz lange hatte mit sorgen .
0,88 vore den juden verborgen .
0,89 der küninc si dô gruozte .
0,90 wande hê genâde suohte .
0,91 hê sprach “vrouwe got muose iu bewaren .
0,92 ich bin verre her gevaren .
0,93 umbe Jêsum bin ich ûz kumen .
0,94 den hânt di juden mir benomen .
0,95 kumen ich zuo lande .
0,96 ich richen sînen anden .
0,97 und sal mir iemer guot von im geschien .
0,98 sô lâzet mich den tuoche sien .

0,99 dâ daz gotes antlütze ane steit .
0,100 ich geben iuch wider iz bereit .
0,101 ob ir mir iz wellet lîhen .
0,102 ir ne durfet ez niet verzîhen .
0,103 wirt mînen vater dâ mite buoz .
0,104 iz ist der kristenheite guot .
0,105 sô wile ich danne her wider varen .
0,106 mit einer roemischen scharen .
0,107 di ungeloubigen wile ich bekêren .
0,108 unde di kristenheit gemêren .
0,109 di juden versenden .
0,110 unde si sêre schenden .
0,111 alse si den gotes sun hânt vertân .
0,112 muoz ich den lîp gesunt hân .”
0,113 di vrouwe den küninc ane sach .
0,114 wande hê von der kristenheite sprach .
0,115 mit süezelîchen gruozen .
0,116 si kniewete vore sîne vuoze .
0,117 si sprach “herre den tuoch hân ich behalten .
0,118 wie süezelîche ist hê gevaltet .
0,119 ich en lieze niet durch sicherheit .
0,120 dâ gotes antlütze ane steit .
0,121 noch durch decheine miete
0,122 di mir ieman gebiete
0,123 iz ist mîn vrôuwede unde mîn trôst .
0,124 dâ wirt manic man erlôst .
0,125 alse der gotes sun selbe wider mich sprach .
0,126 dô hê ez mir bevalh unde ich in lezzeste sach .”
0,127 dô si ne kunden .
0,128 an der vrouwen vinden .
0,129 daz siu in daz tuoch lûwe .
0,130 dâ bâten si durch triuwe .
0,131 daz siu wolte varen über sê .
0,132 unde næme mit ir vrouwen mêr .
0,133 di si dâ heten in huoten .
0,134 des begunde der küninc muoden .
0,135 hê sprach “is daz mîn wille ergeit .
0,136 sô geben ich iu mîne sicherheit .”
0,137 daz entvienc di vrouwe mit sîner hant .
0,138 wande si sîne triuwe hatte bekant .
0,139 dô si den willen gewan .
0,140 dô vrôuwete sich manic roemisch man .
0,141 driu kamerwîp si zuo ir nam .
0,142 dô si mit ireme tuoche quam .
0,143 unde alse di vrouwe was gereit .
0,144 der küninc langer niet en beit
0,145 dô îlten si zuo den kielen .
0,146 dâ di ûnden ane vielen .

0,147 si hatten allez des genuoc .
0,148 des ie kiel getruoc .
0,149 dâ inne hatten si alle ire gewâsheit .
0,150 den vrouwen was ein gadem . gereit .
0,151 dâ hindene bî deme stiure .
0,152 niet en was in tiure .
0,153 ûfe dem mere begunden si vliezen .
0,154 Kyperen begunden si lâzen .
0,155 zuo der zeswen hant .
0,156 unde sigelten umbe Kriechenlant .
0,157 zwûschen Messen unde Volkân .
0,158 begunden si di kiele lân .
0,159 vore Sizilien . unde Kalabrienlant .
0,160 got hatte si schiere dâr gesant .
0,161 aldâ di Tibere in daz mere geit . unde vlôz .
0,162 vröuwede unde horngedoeze .
0,163 hatten si ûfe deme lande .
0,164 wan man wole entkante .
0,165 di roemischen zierheit .
0,166 dô quâmen ros vile gemeit .
0,167 sô vile si ir bedorften .
0,168 wan si den küninc vorhten .
0,169 dô quam zuo Rôme mære .
0,170 wie Titus kumen wære .
0,171 di junge küninc herlich .
0,172 di vürsten sameneten sich .
0,173 unde entviengen in mit schalle .
0,174 dô gruozte hê si alle .
0,175 di vrouwen zounete mit der hant .
0,176 aldâ hê sînen vater vant .
0,177 dâ hê ûf sînem bette lac .
0,178 noch hê en hôrte noch en sach .
0,179 si sprâchen iz wære sîneme ende nâhe .
0,180 dô sprach vrouwe Veronica .
0,181 “gotes antlitze hân ich dir brâht .
0,182 ob dû dich vore hâs bedâht .
0,183 mit ôtmüete salt dû ez entwâhen .
0,184 wilt dû es gelouben hân .
0,185 daz hê manigen hât geheilet .
0,186 unde wirt dir sîn genâde mit geteilet .
0,187 sô würde dû sælic geboren .
0,188 got hât dich danne zuo vriunde erkoren .”
0,189 der küninc sich ûf rihte .
0,190 zehant wart ime lîhte .
0,191 di vrouwe entlôch im den tuocho .
0,192 di wûrme di hê êr des truoc .
0,193 si vielen im ûf den vuoz .
0,194 des grôzen übeles wart im buoz .

0,195 unde dô hê daz antlitze under sîn ougen gedwanc .
0,196 hê wart gesunt unde spranc .
0,197 geheil in den gebæren .
0,198 alse hê drîzicjæric wære .
0,199 dô quam zuo Rôme mære .
0,200 wie der küninc geheilet wære .
0,201 der grôzer siuchede . di hê truoc .
0,202 di vrouwe gehielt aber iren tuoch .
0,203 vile volkes wolte si ane beten .
0,204 si begunde ûf hôher treten .
0,205 si sprach “ich ne wile es niemer lôn envâhen .
0,206 danc iz gote di iz hât getân .
0,207 di durch di sîntær in di werlt quam .
0,208 unde an der megede vleisch nam .
0,209 unde wart geboren âne sünde .
0,210 unde gewan unser natûre künden .
0,211 den di juden hânt gemartelet .
0,212 unde di an dem kriuze leit den tôt .
0,213 und des dritten tages ûf erstuont .
0,214 dô hê di alten vêhede hatte versuont .
0,215 unde des vierzigesten tages ûf zuo himele schreit .
0,216 noch ist hê allen den bereit
0,217 di genâden an in gesinnet
0,218 unde des mit ôtmüete beginnet .
0,219 daz is hener di dir genâde hât getân .
0,220 nû muose es dir nâch heile ergân .”
0,221 der küninc got loben began .
0,222 hê sprach “nû râtet vriunt unde man .
0,223 heizet mir samenen zwâ scharen .
0,224 mit mîneme sune wile ich über mere varen .
0,225 daz di juden mit Jêsus hant begân .
0,226 daz sal in an ire leben gân .
0,227 ob mich læzet der tôt”
0,228 iz was getân daz hê gebôt .
0,229 der küninc was schiere gereit .
0,230 hê huop sich über daz mere breit .
0,231 sîn here was mir vile wole kunt .
0,232 des was drîzien tûsent .
0,233 unde driu hundert unde zwêne unde drîzic manne .
0,234 unde alse hê in daz lant quam .
0,235 di juden begunden vore vliehen .
0,236 dâ mohte man manigen vanen sehen .
0,237 vore zwein roemischen heren .
0,238 alsô geteliche varen .
0,239 der küninc sô zuo Jerusalem reit .
0,240 daz nieman wider in streit .
0,241 di burc hê sô lange besaz .
0,242 biz ein wîp ire kint az .

0,243 dô was di prophêtî volgangen .
0,244 mit ebenhoehe unde mit mangan .
0,245 sô brâchen si di mûren .
0,246 si ne mohten niht langer dûren .
0,247 di juden vienc hê mit der hant .
0,248 di witewe nie niet des entgalt .
0,249 di hûs di hiez hê nider slân .
0,250 der vrouwen erbe liez man stân .
0,251 si brâchen si in den grunt .
0,252 unde kêrten ob den fundament .
0,253 sîn zorn sô ûf di juden traf .
0,254 daz man ir drîzic umbe ein ei gap .
0,255 zien geslehte man ir versante .
0,256 di quâmen zuo eineme gebirge zuo lande .
0,257 di anderen wurden verleitet .
0,258 unde über alle di werlt verscheret .
0,259 sô daz si niemer en gewunnen maht .
0,260 daz hatte ouch der propheta vore gesaht .
0,261 “alse der küninc von der megede wirt geboren
0,262 sô ist alle jüdisch rîche verloren .”
0,263 des vûnden si urkûnde genuoc
0,264 besæhen si di alten buoch .
0,265 sô solten si si wole berihten .
0,266 daz ich di wârheit tihten .
0,267 sôwelicher nû sterbet di is verloren
0,268 iz en sî den got hât erkoren .
0,269 di des tuomes tages erbeitet .
0,270 alse endekrist di werlt verleitet
0,271 und des tiuveles willen begeit .
0,272 unde Enoch und Eliam ersleit .
0,273 di juden di danne lebende sint
0,274 di werdent alle gotes kint .
0,275 sô îlent si zuo toufen .
0,276 deme tiuvele wellent si entloufen .
0,277 unde bekennent di rehten wârheit .
0,278 daz si ire herte hæten leit .
0,1 der heilic engel berihte mînen sin .
0,2 wande ich ein broedic mennische bin .
0,3 unde warte daz ich tihten .
0,4 daz sich eteswie berihte .
0,5 wande iz ist bezzer danne ein leich .
0,6 iz machet harte herze weich .
0,7 daz sich wider hât gote gesatzt .
0,8 nû hoert waz sancte Paulus bat .
0,11 daz got sîn herze muoste beweichen .
0,12 dâr umbe sagen ich iu von deme leiche .
0,13 daz iz nieman mit spotte verstê .
0,14 hê ne merke war diuse rede gê .

0,15 alse ist des spottæres stæticheit
0,16 alse dê rîfe di dâ zuogeit
0,17 di en tar der sunnen niet gebeiten .
0,18 nû wile ich iuch warnen unde bereiten .
0,19 wie ir müget genesen unde sterben .
0,20 unde genesente gotes hulde erwerben .
0,21 von der girheit wile ich iuch künden .
0,22 si gelîchet des meres ünden .
0,23 di der mennische begeit .
0,24 alse der wint daz mere teit .
0,25 hê teit daz mære diezen .
0,26 unde alle wazzer dâr in vliezen .
0,27 iz en mac von der erden .
0,28 niemer gevüllet werden .
0,29 biz an den jungesten tac .
0,30 unde als iz niet vürder en mac .
0,31 diz viur sal iz verschwenden .
0,32 dâ mite sal sîn quâle enden .
0,33 unde alse di sunne und der mâne sîn lôn entveit
0,34 und gires mannes tôt entsteit .
0,35 den hier nieman ervüllen en mac .
0,36 danne en sehet hê niemer tac .
0,37 alle genâde wirt im tiure .
0,38 dâ di wûrme lebent in dem viure
0,39 dâ stürbe hê gerne unde is doch tôt .
0,40 iemer sal hê lîden nôten .
0,41 dâ brinnet daz viur âne licht .
0,42 wie es dem armen danne geschiet .
0,43 di hier sînem vleische sô verhenget .
0,44 al biz iz in in daz vinsternisse brenget .
0,45 ei waz sal deme manne mêr .
0,46 danne daz hê sich mit êren begê .
0,47 unde minne gedult und ôtmuot .
0,48 unde lâze den armen ire guot .
0,49 sô is hê wole geerbet .
0,50 unde hæte sich wole generet .
0,51 hê en darf niet in den winkel vliehen .
0,52 dâ der gire en mac niet gesien
0,53 der heilige geist . müeze uns lêren .
0,54 daz wir unse gemüete kêren .
0,55 von dem vreislîchen tôde .
0,56 daz wir doch tuon sô nôte .
0,57 von der unsæligir girheit .
0,58 wande si di sêle . mitalle ersleit .
0,59 wande sich nieman vore ir en hûetet .
0,60 si ginet alse der hunt di dâ wüetet .
0,61 si is vergiftnisse und ein vreise .
0,62 iz ist reht daz alle di werlt von ir eiset .

0,63 want mit ir ist al di werlt getrôst .
0,64 hê wænet daz hê sule werden gelôst .
0,65 wande hê durch minner schulde .
0,66 verlôs sînes schepfæres hulde .
0,67 di girede vuotet di stolzheit .
0,68 si ne vrîet decheine barmherzicheit .
0,69 deme giren en wirt ouch niemer genuoge .
0,70 ob man im di werlt zuo trûege
0,71 mit sumberen gemezzen .
0,72 dâr umbe hât got der girheite vergezzen .
0,73 waz half Jugurthê sîn grôzer schatz .
0,74 unde manic swatz .
0,75 den hê zuosamene brâhte
0,76 unde niet der sêle gedâhte
0,77 hê hatte in lieber danne den tôt .
0,78 des hatten di Rômære iren spot
0,79 wande si en wurden ime niemer holt .
0,80 sint wart ime daz rôte golt .
0,81 alsô glüentic in den bûch gezozen .
0,82 daz hatte hê der girheite genozen .
0,83 der gire en mac der armen .
0,84 durch got niet . erbarmen .
0,85 den dâ hungert unde vriuset .
0,86 sîne varwe hê verliuset .
0,87 deme armen en is niemer sô wê .
0,88 der girige en denke wie ime des guotes werde mêr .
0,89 unde wie hê des beginne .
0,90 daz hê sînes nâchgebûres erbe gewinne .
0,91 mit wuochere unde mit lucurkûnde .
0,92 daz erbet sünde .
0,93 daz dâr niemer buoze widersteit .
0,94 wan di iz bî zîte widerteit .
0,95 wirt aber im di türe undergangen .
0,96 sô ist hê mit eineme stricke gefangen .
0,97 di niemer en wirt ûf getân .
0,98 hê sal iz arger danne der tiuvel hân .
0,99 sô denket der girige in sînem muote .
0,100 “dû salt dich wole loesen mit dîneme guote .
0,101 dû salt geben zuo kassen und zuo klûsen .
0,102 unde zuo anderen gotes hûsen .
0,103 dû salt mit dîner wîsheite getihten .
0,104 unde ein münster tuon wirken .
0,105 dâ man vüre dich bete biz an di nuone .”
0,106 dâ mite wænet hê machen suone .
0,107 unde also allez geschiet .
0,108 sô en hilfet iz wider di girede niet .
0,109 sô denket hê “dû salt iz anderswâ entsparen .
0,110 dû salt zuo sancte Jakobe varen .

0,111 mit dîner schirpen unde mit dîneme stabe .
0,112 unde vort zuo deme heiligen grabe .
0,113 wirdes dû vunden ûf deme sê .
0,114 dû kumes niemer in helle mêr .”
0,115 unde ob ime des got verhenget .
0,116 daz hê sîn opfer dare bringet .
0,117 daz hê dicke mit unrehte gewan .
0,118 an manigem armen di iz ime übele gan .
0,119 daz opfer is gote alsô mære .
0,120 alse ielîchen mennischen wære .
0,121 daz man ime sînen sun slüege .
0,122 und ime vüre trüege .
0,123 dâ hê zuo einer wirtschefte wære . gesezzen .
0,124 unde spreche “dit salt dû ezzen .”
0,125 wellt ir hoeren von deme dorne .
0,126 di sô sêre stichet vorne .
0,127 sôweme hê kumet in sînen vuoze .
0,128 im en wirt des wêwes niemer buoz .
0,129 hê sal es lange smerzen haben .
0,130 hê nie werde ime mit einer siuwelen . ûz gegraben .
0,131 sô sal hê in verteilen .
0,132 sô beginnet der vuoze heilen .
0,133 die wîle hê des niet ne het getân .
0,134 sô muoz hê hinkente gân .
0,135 di siuwele bezeichnen den smerzen .
0,136 den der mennische het in sîneme herzen .
0,137 daz hê nôte besteit .
0,138a unde alse im got sendet in sînen muot .
0,138b daz hê den armen widertuot .
0,138 alse he sînen wuocher widerteit
0,139 sô is der vuoze geheilet .
0,140 alse hê den dorn verteilet .
0,141 sô versmâhent im alle guot .
0,142 sô is der sêlen gebuozt .
0,143 nû merket . wie sancte Matheô geschach .
0,144 di den dorn rehte besach .
0,145 hê was ein harte rîche man .
0,146 doch hê ez mit wuochere niet en gewan
0,147 hê hatte wehsel unde zol .
0,148 aller werlte wünne was hê vol .
0,149 zuo der rîchheite truoc hê zorn .
0,150 sô sêre vorhte hê den dorn .
0,151 ob hê in gestæche .
0,152 daz iz got an ime ræche .
0,153 der girheite wart hê erbolgen .
0,154 gote begunde hê volgen .
0,155 unde liez wîp unde kint
0,156 wie seltsæne di nû sint

0,157 dâr zuo silber unde golt .
0,158 hê wart im sint sô holt .
0,159 daz hê in zôch in sînen rât .
0,160 wande hê von deme dorne geschriben hât .
0,161 di wilde man di dit tihtet .
0,162 dê is selbe harte unberihtet .
0,163 sôwie iz iedoch im ergê .
0,164 ich wæne hê iemer gesê
0,165 under di scharpfen dorne .
0,166 al hât hê mit zorne .
0,167 harte lange gelebet .
0,168 iz ist ouch reht di wider gote strebet .
0,169 daz hê niemer sicher en gê .
0,170 unde daz der hagel sîn korn . slê .
0,171 unde hōuwespinke ezzen . daz dâ belîbe .
0,172 unde daz dâ niemer sâme belîbe .
0,173 unde sôwen di sūeze erde . versmæhet .
0,174 iz ist allez tōt daz hê sæjet .
0,175 wellt ir hoeren von des rîchen mannes garten .
0,176 dâ man der sūezer vrūhte inne solte warten .
0,177 dâ der diep in beginnet gân .
0,178 wie man deme sal widerstân .
0,179 ob hê vride wile haben .
0,180 sô sal man wirken einen graben .
0,181 dâ daz wazzer alumbe stê .
0,182 daz nieman gæhelîche über gê .
0,183 der grabe bezeichnenet den rîchen man .
0,184 dem got der sælicheite gan .
0,185 der di stolzheit erslæt .
0,186 unde ôtmüete in sîn herze næjet .
0,187 unde weinet sîne sūnde .
0,188 unde wile si sîneme priester künden .
0,189 unde in sîneme râte bestân .
0,190 wile hê gewære riuwen hân .
0,191 daz wazzer daz in deme graben . stât .
0,192 daz is daz von dem herzen zuo den ougen gât .
0,193 nochdanne en hât hê ez niet volletân .
0,194 hê sal einen zûn ûf den graben slân .
0,195 mit manicvaltigen stecken .
0,196 unde sal in vile vaste machen .
0,197 daz dâ nieman über klimmen en müge .
0,198 die wîle daz der man tuge .
0,199 sô gê hê zuo gotes dieneste gerne .
0,200 unde sie daz hê daz lerne .
0,201 daz hê sîn almuose gebe .
0,202 unde reine behalbe sūnde lebe .
0,203 unde lâze sich der armen .
0,204 durch den rîchen got erbarmen .

0,205 mit kleideren unde mit spîsen .
0,206 di siechen sal hê wîsen .
0,207 unde versmæhen alle îtelicheit .
0,208 daz is der zûn di ûfe deme graben stêt .
0,209 nochdanne en wirt der vride niemer guot .
0,210 hê ne sî obene mit dornen behuot .
0,211 unde alse der man dit het bestân .
0,212 sô sal hê zuo grîfen mit beiden handen .
0,213 unde sal den dorn abe houwen .
0,214 daz hê nieman en mûge krouwen .
0,215 unde in ûf sînen zûn vlehten .
0,216 sô bezeichnenet hê den gerehten .
0,217 di daz mit manheite besteit .
0,218 alse hê sîn unreht widerteit .
0,219 di erde . dâ der dorn ûfe stuont .
0,220 di wirt mit deme touwe versuont .
0,221 daz si treget vruht der dâr der man wole mac geniezen .
0,222 nû wile ich iu den garten entsliezen .
0,223 wie iz der mennische sal ane vâ .
0,224 ob hê dâr in wile gân .
0,225 wile hê dâ mit vride leben .
0,226 hê sal allez wider geben .
0,227 daz hê mit wuochere genam .
0,228 oder mit lucurkûnde gewan .
0,229 an manne oder an wîbe .
0,230 daz niemer pfenninc en belîbe .
0,231 sint si aber erstorben .
0,232 sô gebe hê ez iren erben .
0,233 alse hê dit danne het getân .
0,234 sô mac hê sicherlîche gân .
0,235 in den bevideten boumgart .
0,236 di vore deme diebe is bewart .
0,237 di durch di grôze stolzheit .
0,238 viel in grôze arbeit .
0,239 nû merket wie hê mit Adâme ane huop .
0,240 deme hê ze êrst durch sîne swelle gruop .
0,241 unde riet daz in got verstiez .
0,242 dô hê im mit lûgenen wârheit enthie .
0,243 vore diseme widerwarten .
0,244 sô hât dis man sînen garten .
0,245 harte wole gedornet .
0,246 hê en wirt niemer gezûrnet .
0,247 swê den guoten sâmen welle sæjen .
0,248 hê sal deme heiligen geiste vlêhen .
0,249 unde geben sich vaste in sîne gewalt .
0,250 sô machet hê in wîs unde balt .
0,251 unde ermêret sîne vernûnsticheit .
0,252 di di stolzheit dâr nider sleit .

0,253 spot unde hôchmuot .
0,254 di en sint niergen guot .
0,255 der spottær lebet ûfe deme rîfe .
0,256 di dâ vellet in den sîfen .
0,257 hê ne wirt niemer geerbet .
0,258 wen daz hin di wirme sterbet .
0,259 zuo den schoenen bluomen hât hê haz .
0,260 hê en mac niet tuon baz .
0,261 hê en het decheine stâticheit .
0,262 als in di sunne ane geit .
0,263 sô muoz hê vliezen in di bach .
0,264 hê en gewinnet niemer gemach .
0,265 al biz hê kumet in den sê .
0,266 sô hât er ez arger danne êr .
0,267 michel wirs sal der spottær gedîen .
0,268 der sich niet en læzet verkrîen .
0,269 in der helle leget hê fundamunt .
0,270 des wirt sîn arme sêle wunt .
0,271 daz vergiftnisse hê vore ime treget .
0,272 sô wirt al sîn bluot erweget .
0,273 der hôhe muot ziuget daz lucurkûnde .
0,274 daz is di meiste sünde .
0,275 iz en wirt niemer widertân .
0,276 hê mac wole mit deme verrâtære gân .
0,277 di mit den ougen wenken .
0,278 si bezeichnenent den hœuwesprenken .
0,279 di liget unde verzert di vruht .
0,280 sô wile hê sich heben in di luft .
0,281 unde vellet nider in daz gras .
0,282 tiefer danne hê êr was .
0,283 alse lîhte kumet dirre drîer val .
0,284 dâ vore hûete sich mennischenkûnne al .
0,285 unde sôwê dit is daz hê es abe stê .
0,286 êr in di segense . übergê .
0,287 di segense bezeichnenet den tût .
0,288 di bluome sî wîz oder rôr
0,289 sôwaz si mit der wassen geveit .
0,290 allez si dâr nider sleit
0,291 sô wirt ez zuo eineme hœuwe .
0,292 iz ist wunder daz ich mich iemer gevrœuwe .
0,293 sint daz ich dise bôsheit . über mir tragen .
0,294 unde werden wir mit diseme netze erslagen .
0,295 dâ der tiuvel den mennischen geveit .
0,296 sô ist unse lange arbeit .
0,297 jâmerlîche zuo ende kumen .
0,298 unser kein en kan dem anderen gevrumen .
0,299 waz hilfet den man di grôze rîchheit .
0,300 als in der tût dâr nider sleit .

0,301 mit ime en vüeret hê niet mêr .
0,302 wan ein hemedē wîz alse der snê .
0,303 unde einen lendemunt in einer bruoch .
0,304 dâ mite man es dunket genuoge .
0,305 daz ander læzet hê sînen kinden .
0,306 wâ sal hê herberge vinden .
0,307 dâ hê geruowe di êrste naht .
0,308 hê en habe sich bî zîte vore bedâht .
0,309 het hê daz unreht widertân .
0,310 daz sihet hê allez vore ime stân .
0,311 unde reine almuosen gegeben .
0,312 daz hilfet ime êwicliche leben .
0,313 unde læt hê den armen sîn dach .
0,314 sô gewinnet hê ruowe unde gemach
0,315 unde en het hê des niet getân .
0,316 sô muoz hê umbe di stuole gân .
0,317 under di trupfen . âne dach .
0,318 hê nie gewinnet niemer gemach .
0,319 di âne barmherzicheit lebet als ein vie .
0,320 unde sündet âne vorhte hier .
0,321 der wirt ane geworfen unde entslagen .
0,322 dâ hê sal weinen unde klagen .
0,323 der riuwe is danne zuo spæte .
0,324 die nâhwoletæte .
0,325 helfent dem gerechten manne .
0,326 dê iz mit wuochere niet en gewan .
0,327 daz im iz zuo staten steit
0,328 sôwaz man ime nâch teit .
0,329 dâ alle sünde sule blecken .
0,330 wie stênt den maselsühtigen ire vleckē .
0,331 alsô gebæret der gîre man .
0,332 den nieman vollen gesagen kan .
0,333 merket wie der maselsühtige teit .
0,334 alsô gebæret ouch di girheit .
0,335 der gire en wirt niemer vol sînes gedankes .
0,336 alsô en teit der maselsühtige sînes trankes .
0,337 sô ist der girige iemer gelîche geleitet
0,338 aldâ im allez daz leidet .
0,339 daz hê mit den ougen gesît .
0,340 in der helle wirt ein michel strît .
0,341 dâ vluochet der vater sîneme kinde .
0,342 hê sprichet “unsælic ich dich vinde .
0,343 in dem beche müezes dû iemer leben .
0,344 deme tôde hân ich mich ergeben .
0,345 aldurch dîne schulde .
0,346 ouch hân ich gotes hulde .
0,347 durch dînen willen verloren .
0,348 unsælic wurdēs dû ie geboren .

0,349 dû wær vervluochet dô ich dich gewan .
0,350 wande dich erbarmete nieman .
0,351 durch dînen willen wuocherte ich genuoc .
0,352 dâ bî ich lucurkûnde truoc .
0,353 di armen twanc ich under mich .
0,354 dâ mit sô erbete ich dich .
0,355 des sîn wir êwiclîche tôt .
0,356 möhte ich nû sterben des wære mir nôt .”
0,357 dit ist ein jâmerlich strît .
0,358 alse der sun wider zuo dem vater quît .
0,359 “daz erbe daz dû mir hâs gegeben .
0,360 dâ müezest dû tôtlîche leben .
0,361 in dem êwelîchen viure .
0,362 alle genâde sî dir tiure .
0,363 got gap dir vûnv sinne .
0,364 dâ wuochertes dû inne .
0,365 des en dûhte dich nie niet genuoc .
0,366 des dir di arme zuo truoc .
0,367 des salt dû mit wûrmen leben .
0,368 die dir iemer hitze sal geben .
0,369 daz sint nâteren unde kraten .
0,370 si sulen dich girlîche gesaten .
0,371 dû wære uns beiden unnütze .
0,372 ich teilen dir den hellepfütze .
0,373 dê is obene enge unde nidene wît .
0,374 dâ man niemer vrôuwede en sît .”
0,375 here ane gedenke man unde wîp .
0,376 dit ist ein unstæte lîp .
0,377 di girheit sulen wir lâzen .
0,378 unde tragen uns mit mâzen .
0,379 unde minnen barmherzicheit .
0,380 di alle bôsheit dâr nider sleit .
0,381 unde gedult unde ôtmuot
0,382 di machet unse sinne guot .
0,383 sôwê gote dienet . hê wirt gekroenet .
0,384 der nû tiuvele dienet . mit übele ime lônnet .
0,385 eintwederen wec müezen wir gân .
0,386 die wîle wir di küre hân .
0,387 nû biten wir di namen drî .
0,388 sôwaz an uns wandelbæric sî .
0,389 daz hê daz geruoche stillen .
0,390 unde beneme uns boesen willen .
0,391 unde kêren an unser sêlen heil .
0,392 sôwâ des heiligen geistes ein teil .
0,393 gespringe an ein herze .
0,394 daz wirt entvenget âne smerzen .
0,395 daz wirt ein erwelet vaz .
0,396 dâ en wonet inne nît noch haz .

0,397 waz is danne daz dâ inne bûwet .
0,398 daz iz aller der werelte getrûwet .
0,399 want iz ouch niemannen betrüebet .
0,400 unde wider got nie niet geüebet .
0,401 wâ mite wirt daz viur gebuozt .
0,402 daz is gedult unde ôtmuot .
0,403 daz is dir allerbezziste mite .
0,404 unde benimet alle übele site .
0,405 unde wese barmherzic . wider sich selben niet .
0,406 wan daz eineme anderen zuo übele geschiet .
0,407 sô stîget daz wazzzer durch di gluot .
0,408 si sint doch beide wole behuot .
0,409 wande iz ouch under . alle engele liuhtet .
0,410 daz wazzzer en het daz viur niet gebüezet .
0,411 di doch sint zuosamene gemenget .
0,412 dâ mite müezen wir werden besprenget .
0,413 sô mügen wir âne wêwen .
0,414 kumen zuo den êwen .
0,415 mit deme wazzere . werden wir gewaschen .
0,416 daz viur brinnet âne aschen .
0,417 wan iz schînet alse di sunne teit .
0,418 dâ si an iren ahte tugenden steit .
0,419 der si niuwet danne eine en hât .
0,420 dâ mite si nû umbe gât .
0,421 der heilige geist . hât diu maht .
0,422 als uns di schrift vore hât gesaht .
0,423 daz hê dit allez wole volbrenget
0,424 ob im es di mennischheit verhenget .
0,1 Israhel daz quît “got siente .”
0,2 des wâren di juden jiente .
0,3 dô si got gesante .
0,4 ûze des Pharaonis lande .
0,5 dâ herr Moses in daz mære entslôz .
0,6 daz dâ êr . mit grôzen ûnden vlôz .
0,7 mit einer ruoten di dâ maget hiez .
0,8 unde hê iz aber wider liez .
0,9 biz Pharaon dâ inne ertranc .
0,10 daz bezeichnenet daz der tiuvel versanc .
0,11 dô in der gotes sun gebant .
0,12 unde nam di sîne di hê dâ vant .
0,13 di ruote bezeichnenet di mâtheit .
0,14 dâ der gotes sun durch von himele schreit .
0,15 dô hê di mennischheit ane nam .
0,16 unde als unbewollen von ir quam .
0,17 alse der busch di dâ brante .
0,18 dâ herre Moses got inne erkante .
0,19 dâ hê selbe wider in sprach .
0,20 daz hê daz holz grüne sach .

0,21 sô daz diz holz nie loup verlôs .
0,22 dô hê den sumerlaten erkôs .
0,23 got gebôt im daz hê in brach .
0,24 unde alse hê sich rehte besach .
0,25 dô nam hê si an dem ende
0,26 unde warf si von der hende .
0,27 dô wart si zuo eineme slangen .
0,28 unde quam wider zuo im gegangen .
0,29 dit was wunder daz iz geschach .
0,30 hê huop in ûf alse hê in sach .
0,31 dô was iz aber ein virga .
0,32 daz was sancte Maria .
0,33 dâ herre Isaias abe sprach .
0,34 dô hê si in deme heilicgeiste gesach .
0,35 daz alle di prophêten hânt abe geschriben .
0,36 daz is der kristenheite beliben .
0,37 Ezechiel eine porten sach .
0,38 von golde liechter danne der tac .
0,39 unde von edelme gesteine .
0,40 si stuont beslozen aleine .
0,41 ein gezieret küninc dâ durch reit .
0,42 daz bezeichnenet di magetheit .
0,43 dâ sich got wolte an erniuwen .
0,44 des en wellent di juden niet getrûwen .
0,45 wande si ie wider daz reht striten .
0,46 si geloubent daz ein jude quæme geriten .
0,47 durch eine porten di nie ûf quam .
0,48 unde ouch von der êwe di herre Moses nam .
0,49 geschriben an sîneme steine
0,50 wiste si got veste unde reine .
0,51 sô hæte hê iz an ein pergament gesatzt .
0,52 dô es in herre Moses gebat .
0,53 dit geloubeten si alle âne underscheit .
0,54 sôwie si berihtet iz ist in leit .
0,55 mit der herten tragent si überein .
0,56 daz is di sâme di dâ vellet ûf den stein .
0,57 hê spriuzet biz hê grüne steit .
0,58 alse im di viuhete abe geit .
0,59 sô muoz hê dorren âne ire huote .
0,60 alse dô in di spîse von der luft .
0,61 quam gevallen als ein snê .
0,62 durch girheit nâmen si es mêr .
0,63 danne in der êwe sehte .
0,64 dô verluren si iz mit rehte .
0,65 ir enkein en kan deme anderen niet gevrumen
0,66 wande dô en mac ir kein dâr abe kumen .
0,67 di dâr iemer zuo guote gedîhe .
0,68 di sint an jâmerlichem krîge .

0,69 mit herzen ougen sint si blint .
0,70 ez is Ende krist des si wartente sint .
0,71 Messias ist in ungeret .
0,72 hê was di küninc di durch dise beslozzene porten reit .
0,73 di porte di dâ beslozzene steit .
0,74 si bezeichnenet di reinicheit .
0,75 also daz reine herze beslozzene steit .
0,76 wande dâr niemer bôsheit in en geit .
0,77 diu wîsheit het sich dâr in gesatzt .
0,78 unde geit den bezzisten tugenden stat .
0,79 dâ di porte was gesteinert .
0,80 dâ mite was di maget gemeinet
0,81 got sante ir sînen boten zehant
0,82 di was Gabriêl genant .
0,83 hê sprach "heil sîs dû Maria .
0,84 vol bist dû der genâden .
0,85 al himeles here het dich bekant .
0,86 dir entbiutet di hôheste heilant .
0,87 hê wile sich an dir erniuwen .
0,88 des salt dû wole getrûwen ."
0,89 der heilige geist was under in .
0,90 zuo ire schedelen vuor hê in .
0,91 unde wart der gotes sun . gesatzt .
0,92 in der wîsheite stat .
0,93 dâ muoste hê ervûllen
0,94 sînes vateres willen .
0,95 âne vrecken si maget von ime genas .
0,96 also di sunne schînet durch daz glas .
0,97 dâ was si muoter unde maget .
0,98 si entveit ire sunderliche kleit .
0,99 si is barmherzic unde milte .
0,100 des gesinnet ouch dê wilde
0,101 dê kûndet iu . di mære .
0,102 Jêsus daz quît "heilære ."
0,103 in hebrêischen hiez hê Messias .
0,104 wande hê got unde mennische was .
0,105 "heiligeste heilige" hiez in Daniêl .
0,106 Isaias "Emanuêl ."
0,107 daz sprichet "got sî mit uns ."
0,108 daz is der briutegome sponsus .
0,109 der di kristenheit zuo einer brût erkôs .
0,110 dâ mit der tiuvel verlôs .
0,111 daz hê mit lûgene gewan .
0,112 beide wîp unde manne .
0,113 wurden an deme kriuze erlöst .
0,114 alsus hât uns der megede sun erlöst .
0,115 beati qui audiunt verbum dei
0,116 et custodiunt illud .

0,117 iz ist reht daz wir iz iu . diuten .
0,118 wande iz kristenen liuten .
0,119 geschriben ist zuo heile .
0,120 daz ein iewelich mennische teile .
0,121 dem anderen daz hê guotes kan .
0,122 des vaz en wirdet niemer wan .
0,123 sôwê daz gotes wort gerne hoeret .
0,124 unde zuo guote kêret .
0,125 hê is sælic ob hê ez behalten kan .
0,126 des wirt gebüezet manic man .
0,127 sô en muoz hê niwet eine kumen .
0,128 al der werelte sal hê vrumen .
0,129 die tumben sal hê berihten . unde lêren .
0,130 unde alle siten ze nîde kêren
0,131 sô mac di guote sâme beklîben .
0,132 an manne unde an wîbe .
0,133 niemer boese vruht hê getreget .
0,134 di eineme süntære sîn herze beweget .
0,135 di machet al himeles here vrô .
0,136 hê leitet den tiefen brunnen . hôhe .
0,137 di von dem herze zuo den ougen . geit .
0,138 unde di alten sünden abe tweit .
0,139 di werden der sunnen . gelîch .
0,140 alsus machet man den armen rîche .
0,141 mit der selber tugende sulen wir uns bewaren .
0,142 daz wir eine zuo himele niet en varen .
0,143 nû hoeret wie regina austri sprach .
0,144 dô si herren Salomon ze êrst sach .
0,145 dâ mite si in versuochte
0,146 “diu eine wîse diu andere gruozte .”
0,147 dit solten alle di minnen .
0,148 di sint von scharpfen sinnen .
0,149 wande ich en halten ine niet vûre wîsen man .
0,150 di guote liste aleine kan .
0,151 wande verborgene wîsheit .
0,152 der sêlen niet versteit .
0,153 an weme si erstirbet .
0,154 sô daz si keine vruht erwirbet .
0,155 dem moechte lieber wesen hier .
0,156 daz hê wære tumber danne ein vihe .
0,157 di wîsheit wile daz man si teile .
0,158 wande si geschaffen ist zuo heile .
0,159 hê kunde lützel mêr wan si .
0,160 si sprach “prudens prudens .”
0,161 si gibet allen den tugenden maht .
0,162 iz en wirt ouch niemer güete vollebrâht .
0,163 man en neme es zuo der wîsheite rât .
0,164 hê is sælic di si gevazzet hât .

0,165 inde hât deme tiuvele widersât .
0,166 unde nimet von der wîsheite maht
0,167 dem wirt daz himelrîche bekant .
0,168 wande di is Sapientia genant .
0,169 wir en mûgen di wîsheit niet gewinnen .
0,170 wir en wellen di triuwe minnen .
0,171 Abraham was di êrste man
0,172a unde was der êrste deme manne .
0,172b di der triuwen began .
0,172 di der triuwen began .
0,173 des wolte got zuo ime gân .
0,174 alse drî engele getân .
0,175 di betete hê ane vûre einen got .
0,176 daz was daz êrste gebot
0,177 daz nû di kristenheit begeit .
0,178 di heilige drîvalticheit .
0,179 di sûeze sanctus trinitas .
0,180 gibet der triuwen . rât als ich iz las .
0,181 wande di wîsheit reichet ire di hant .
0,182 von diu is si wîsheit genant .
0,183 wellen wir di wîsheit ane beten .
0,184 sô mûezen wir ûf di leiteren treten .
0,185 di in den hôhesten himel geit .
0,186 daz is di ôtmüetigheit .
0,187 si nimet der sunnen iren schîn .
0,188 si mac vile wole daz olei sîn .
0,189 daz man in di toufe giuzet .
0,190 unde iemer enboben vliuzet .
0,191 wande des heiligen geistes rât .
0,192 mit der ôtmüete stât .
0,193 des is si dem gehôrsam .
0,194 von diu heizet si oboedientia .
0,195 di dâ barmherzic sint .
0,196 di sint alle gotes kint .
0,197 wande got sal sich über si erbarmen .
0,198 si troestent di armen .
0,199 wanne iemanne misseschiet .
0,200 des en vrôuwent si sich niet .
0,201 wande si mit der wîsheite sint .
0,202 dâr umbe is daz gelücke blint .
0,203 erteilet ungelîche .
0,204 machet manigen rîche .
0,205 di barmherze nie en gewan .
0,206 noch durch got niet geben en kan .
0,207 nâch iren werken wirt in gelônnet .
0,208 alsô got misericordiam gekroenet .
0,209 unde leitet si vûre di wîsheit .
0,210 aldâ ôtmüete steit .

0,211 dâ vindet man hoffungen unde triuwe .
0,212 si lebent âne riuwe .
0,213 ir iegelich bî dem anderen liet .
0,214 si en kunnen sich gescheiden niet .
0,215 alsus wirt in ire lôn gegeben .
0,216 si sulen êwicliche leben .
0,217 vruo unde spâte . di vröuwede niemer zuogit .
0,218 alsus leitet si di wîsheit .
0,219 wande ich en heizen niemannen rîche .
0,220 hê ne lebe êwigliche .
0,221 des helfe uns pater et filius
0,222a di dit buoch geschriben hât .
0,222b gebüezen müeze hê sîne missetât .
0,222c unde iemer êweliche .
0,222d besitzen daz himelrîche .
0,222 et spiritus sanctus . âmen .